

Najib lancar Pusat Transformasi Luar Bandar pertama di Gopeng bulan depan
Utusan Online
Januari 12, 2012

KUALA LUMPUR 11 Jan. - Perdana Menteri, Datuk Seri Najib Tun Razak akan merasmikan Pusat Transformasi Luar Bandar (RTC) yang pertama di Gopeng, Perak pada 18 Februari ini.

Menurut jurucakap Kementerian Kemajuan Luar Bandar dan Wilayah, RTC Gopeng merupakan pusat perintis setelah kerajaan memperkenalkan Program Transformasi Luar Bandar (RTP), Mei tahun lalu.

"Lebih 12,000 pengunjung dijangka menghadiri majlis perasmian tersebut. Antara aktiviti yang akan diadakan ialah pameran agensi awam, peluang kerjaya, demonstrasi produk dan perkhidmatan oleh lima kementerian dan agensi masing-masing," katanya, dalam satu kenyataan di sini, hari ini.

Menurut jurucakap itu lagi, di bawah RTC sebanyak lapan inisiatif sedang dilaksanakan oleh pelbagai kementerian dengan agensi yang berkaitan bagi membangunkan kawasan luar bandar.

"Kementerian dan Kementerian Pertanian dan Industri Asas Tani merupakan tonggak utama yang menerajui pelaksanaan program-program di bawah RTC. Ia turut disertai oleh Kementerian Pengajian Tinggi, Kementerian Kesihatan dan Kementerian Kewangan.

"Inisiatif-inisiatif tersebut ialah latihan kemahiran penduduk luar bandar, penubuhan kiosk informasi 1Malaysia, pertanian bernilai tinggi, pemprosesan produk agro makanan, pengurusan rantai bekalan hasil pertanian, perkhidmatan keselamatan makanan dan farmaseutikal serta kemudahan pembiayaan kewangan," katanya.

Dalam pada itu, tambah jurucakap tersebut, sehingga kini terdapat 15 program latihan telah dilaksanakan di RTC Gopeng dan kawasan sekitarnya.

"Antaranya, latihan yang terdapat di situ ialah keusahawanan, persembahan produk, pembungkusan, teknik fertigasi dan baik pulih penghawa dingin," katanya

Tambahnya, pelaksanaan program-program tersebut diharapkan dapat menjadikan masyarakat luar bandar lebih berdaya saing serta berupaya meningkatkan kualiti dan kuantiti produk mereka.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0112&pub=Utusan_Malaysia&sec=Dalam_Negeri&pg=dn_02.htm